



水經卷第十二

漢桑欽撰

後魏酈道元注

聖水

巨馬水

聖水出上谷

故燕也秦始皇二十三年置上谷郡王隱晉書地道志曰郡在谷之頭故因以上谷名焉王莽改名朔調也水出郡之西南聖水谷東南流逕大防嶺之東首山下有石穴東北洞開高廣四五丈入穴轉更崇深穴中有水者舊傳言昔有沙門釋惠彌者好精物隱嘗篝火尋之傍水入穴三里有餘穴分為二穴如小西北出不知趣諸一穴西南出入水逕五六日方還又不測窮深其水夏冷冬温春



秋有白魚出穴數日而返人有採捕食者美珍常味蓋亦丙穴嘉魚之流類也是水東北流入聖水聖水又東逕玉石山謂之玉石口山多珉玉燕石故以玉石名之其水伏流里餘潛源東出又東頽波瀉澗一丈有餘屈而流也

東過良鄉縣南

聖水南流歷縣西轉又南逕良鄉縣故城西王莽之廣陽也有防水注之水出縣西北大防山南而東南流逕羊頭阜下俗謂之羊頭溪其水又東南流至縣東入聖水聖水又南與樂水合水出縣西北大防南山東南流歷縣西而東南流注聖水又東過其縣故城南又東逕聚聖南蓋藉水而懷稱也又東與挾河合水出良鄉縣西甘泉原東谷東逕西鄉縣故城北王莽之移風也世謂之都鄉城按地理志涿郡有西鄉縣而無都鄉城蓋世傳之非也又東逕良鄉城南又東北注聖水世謂之扶活河又名之白非潔之溝也

又東過長鄉縣北

聖水自涿縣東與桃水合首受涑水於徐城東南良鄉西分洹水世謂之南涉溝即杭水也東逕迺縣北又東逕涿縣故城下與涿水合世以爲涿水又亦謂之桃水出涿縣故城西南奇溝東八里大坎下數泉同發東逕桃仁墟北或曰因水以名墟則是桃水也或曰終仁之故居非桃水也余按地

理志桃水上承涑水此水所發不與志同謂終爲是又東北與樂堆泉合水出堆東東南流注于涑水涑水又東北逕涑縣故城西流注于桃應劭曰涑郡故燕漢高帝六年置其南有涑水蓋氏焉闕駟亦言是矣今於涑城南無水以應之所有唯西南有是水矣應劭又云涑水出上谷涑鹿縣余按涑水自涑鹿東注濕水濕水東南逕廣陽郡與涑郡分水漢高祖六年分燕置涑郡涑之爲名當受涑水通稱矣故郡縣氏之但物理潜通所在分發故在上谷爲涑耶水山川阻闊並無公注之理所在受名者皆是經隱顯相關遙情受用以此推之事或近矣而非所安也桃水又東逕涑縣故城北

王莽更名垣翰晉大始元年改曰范陽郡今郡理涑縣故城城內東北角有晉康王碑城東有范陽王司馬虓廟碑桃水又東北與洹水會水上分涑水於良鄉縣之桃水世謂之北涉溝故應劭曰洹水出良鄉東逕垣縣故城北史記音義曰河間有武垣縣涑有垣縣漢景帝中元三年封匈奴降王勝爲侯國王莽之垣翰亭矣世謂之垣城非也又東逕垣亦地名也故有垣上言世名之垣前河又東洛水注之水上承鳴澤渚渚方一十五里漢武帝元封四年行幸鳴澤者也服虔曰澤名在廼縣北界卽此澤矣西則獨樹水水注之出廼縣北山東入渚北有甘泉水注之出良鄉西山東南逕西

鄉城西而南注澤渚水又東逕西鄉城南又東逕垣縣而南入垣水垣水又東逕涿縣北東流注于桃故應劭曰垣水東入桃闕駟曰至陽鄉注之今按經脉而不能屆也桃水東入陽鄉東注聖水聖水又東廣陽水注之水出小廣陽西山東逕廣陽縣故城北又東福祿水注焉水出西山東南逕廣陽縣故城南東入廣陽水亂流東南至陽鄉縣右注聖水聖水又東南逕陽鄉城西不逕其北矣縣故涿之陽亭也地理風俗志曰涿縣東五十里有陽鄉亭後分爲縣王莽時更名章武卽長鄉縣也按太康地記涿有長鄉而無陽鄉矣聖水又東逕長興城南又東逕方城縣故城李牧伐燕取方城是也魏封劉放爲侯國聖水又東左會白祀溝溝水出廣陽縣之婁城東東南流左合婁城水水出平地導泉東南流右注白祀水亂流東南逕常道城西故鄉亭也西去長鄉城四十里魏少帝璜甘露三年所封也又東南入聖水聖水又東南逕韓城東詩韓奕章曰溥彼韓城燕師所完王錫韓侯其追其貊奄受北國鄭玄曰周封韓侯居韓城爲侯伯言爲獫夷所逼稍稍東遷也王肅曰今涿郡方城縣有韓侯城世謂寒號非也聖水又東南流右會清淀水水發西淀東流注聖水謂之劉公口也

又東過安次縣南東入于海

聖水又東逕勃海安次縣故城南中平二年桓帝封荊州刺史王敏爲侯國又東南流注于巨馬河而不達于海也

巨馬河出代郡廣昌縣涑山

即涑水也有二源俱發涑山東逕廣昌縣故城南王莽之廣屏魏封樂進爲侯國矣涑水又東北逕西射魚城東南而東北流又逕東射魚城南又屈逕其城東竹書紀年曰荀瑤伐中山取窮魚之丘窮射字相類疑卽此城也所未詳矣涑水又逕三女亭西又逕樓亭北左屬白澗溪水有二源合注一川川石皓然望同積雪故以物色受名其水又東北流謂之石曹水伏流地下溺則通津委注謂

之白澗口涑水又東北桑谷水注之水南發溪北注涑水涑水又北逕小鬻東又東逕大鬻南蓋霍原隱教授處也徐廣云原隱居廣陽山教授數千人爲王浚所召雖千古世懸猶表二鬻之稱旣無碑頌竟不知定誰居也涑水又東北歷紫石溪口與紫水合水北出聖人城北大亘下東南流左會壘砢溪水蓋山崩委澗積石淪隍故溪澗受其名矣水出東北西南流注紫石溪水紫石溪水又逕聖人城東又東南石會檐車水水出檐車硎東南流逕聖人東南城南流注紫石水又南注于涑水涑水又東南逕榆城南又屈逕其城東謂之榆城河涑水又南逕藏刀山下層巖壁立直長千霄遠

望崖側有若積刀鏢鏢相比咸悉西首涑水東逕徐城北出焉世謂之沙溝水又東督亢溝出焉一水東南流即督亢溝也一水西南出即涑之故瀆矣水盛則長津弘注水耗則通波潛伏重源顯於廼縣舊則川矣

東過廼縣北

涑水上承故瀆於縣北垂重源再發結爲長潭潭廣百許步長數百步左右翼帶洧流控引水自成淵渚長川漫下十一許步東南流逕縣故城東漢景帝中元三年以封匈奴降王隆強爲侯國王莽更名廼屏也謂之巨馬河亦曰渠水也又東南流袞本初遣別將崔巨業攻固安下退還公孫瓚追擊之於巨馬水死者六七千人即此水也又東南逕范陽縣故城北易水注之

又東南過容城縣北

巨馬水又東酈亭溝水注之水上承督亢溝水於廼縣東南流歷紫淵東余六世祖樂浪府君自涿之先賢鄉爰宅其陰西帶巨川東翼茲水枝流津通纏絡墟圃匪直田漁之贍可懷信爲遊神之勝處也其水東南流又名之爲酈亭溝其水又西南轉歷大利亭南入巨馬水又東逕容城縣故城北又東督亢溝水注之水上承涑水於涑谷引之則長津委注過之則微川輟流水德含和變通在我東南流逕廼縣北又東逕涿縣酈亭樓桑里南

即劉備之舊里也又東逕督亢澤澤苞方城縣縣故屬廣陽後隸於涿郡國志曰縣有督亢亭孫暢之述畫有督亢地圖言燕太子丹使荆軻齎入秦秦王殺軻圖亦絕滅也理書上古聖賢塚地記曰督亢地在涿郡今故安縣南有督亢陌幽州南界也風俗通曰沆漭也言乎滛滛漭漭無崖際也沆澤之無水斥鹵之謂也其水自澤枝分東逕涿縣故城南又東逕漢侍中盧植墓南又東散爲澤渚督亢澤也北屈涯于桃木督亢水又南謂之白溝水南逕廣陽亭西余而南枝溝溝水西受巨馬河東出爲枝溝又東注白溝白溝又南入于巨馬河巨馬河又東南逕益昌縣濩澱水石注之水上承護陂於臨鄉縣故城西東南逕臨鄉南漢封廣陽王子須爲侯國地理風俗記曰方城南十里有臨鄉城故縣也城南十里淀水又東南逕益昌縣故城西南入巨馬水巨馬水東逕益昌縣故城南漢封廣陽頃王子嬰爲侯國王莽之有秩也地理風俗記曰方城縣東八十里有益昌城故縣也又東八丈溝水注之水出安次縣東北平地泉東南逕安次城東東南逕泉州縣故城西又南右合寧池河枯溝溝自安次西北東逕常道城東安次縣故城西晉司空劉琨所守以拒石勒也又東南至泉州縣西南東入八丈溝又南入巨馬河亂流東注也

又東過勃海東平舒縣北東入于海
地理志曰涑水東南至容城入于海河即濡水也
蓋升以明會矣巨馬水於平舒北南入于寧池而
同歸於海也

水經卷第十二

水經卷第十三

濕水

漢桑欽撰

後魏酈道元注



濕水出鴈門陰館縣東北過代郡桑乾縣南

濕水出于濕頭山一曰治水泉發于山側沿坡歷
澗東北流出山逕陰館縣故城西縣故樓煩鄉也
漢景帝後元三年置王莽更名富臧矣魏天安三
年齊平徙其民於縣立平齊郡濕水又東北流左
會桑乾水縣西北上下洪源七輪謂之桑乾泉即
涑涑水者也耆老云其水潛承太原汾陽縣北燕
京山之大池池在山原之上世謂之天池方里餘
其水澄渟鏡淨而不流若安定朝那之湫淵也清

水流潭皎焉冲照池中嘗無斤草及其風澤有淪
輒有小鳥翠色投淵銜出若會稽之私鳥也其水
陽焊不耗陰霖不濫無能測其淵深也古老相傳
言嘗有人乘車於池側忽過大風飄之於水有人
獲其輪於桑乾泉故知二水潜流通注矣池東隔
阜又有一石池方可五六十步清深鏡潔不異大
池桑乾水自源東南流右會馬邑川水水出馬邑
西川俗謂之磨川矣盖狄語言訛馬磨聲相近故
爾其水東逕馬邑縣故城南于寶搜神記曰昔秦
人築城於武周塞內以備胡城將成而崩數矣有
馬走一地周旋反覆父老異之因依以築城城乃
不崩遂名馬邑或以爲代之馬城也諸記紛競未

識所是漢以斯邑封韓王信後爲匈奴所圍信遂
降之王莽更名之曰章昭水其東流桑乾水桑乾
水又東南流水南有故城南北臨河又東南右合
濕水亂流枝之南分桑乾水又東左合武周塞水
水出故城東南流出山逕日没城南盖夕陽西頽
戎車所薄之城故也榮有日中城城東又有早起
城亦曰食時城在黃瓜阜北曲中其水又東流右
注桑乾水桑乾水又東南逕黃瓜阜曲西又屈逕
其堆南徐廣曰猗盧廢嫡子曰利孫于黃瓜堆者
也又東右合枝津枝津上承桑乾河東南流逕桑
郡北大魏因水以立郡受厥稱焉又東北左合夏
屋山水水南出夏屋山之東溪西北流逕故城北

所未詳也又西北入桑乾枝水桑乾枝水又東流
津委浪通結兩湖東湖西浦淵潭相接水至清深
晨鳧夕鴈泛濫其上黛甲素鱗潛躍其下俯仰池
潭意深魚鳥所寡唯良木耳俗謂之南池池北對
注陶縣之故城故曰南南池也池水又東北注桑
乾水為濕水並受通稱矣濕水又東北逕魏亭西
蓋皇魏天賜三年之所經建也濕水又東北逕白
狼堆南魏列祖道武皇帝於是遇白狼之瑞故斯
阜納稱焉阜上有故宮廟樓榭基雉尚崇每至鷹
隼之秋羽獵之日肆閱清野為昇眺之逸地矣濕
水又東流四十九里東逕巨魏亭北又東崞川注
之水南出崞山縣故城南王莽之崞張也縣南面

玄岳右背崞山處三山之中故以崞張為名矣其
水又西出山謂之崞口北流逕繁峙故城東王莽
之富要也又北逕巨魏亭又北逕劇陽縣故城西
王莽之善陽也按十三州志曰在陰館縣東北一
百三里其水又東注于濕水濕水又東逕班縣南
如渾水注之水出涼城旋鴻縣西南五十餘里東
流逕故城南北俗謂之獨谷孤城水亦即名焉東
合旋鴻池水水出旋鴻縣東山下水積成地北引
魚水水出魚溪南流注池池水吐納川流以成巨
沼東西二里南北四里北對涼州地之南池池方
五十里俗名乞伏袁池雖隔越山阜鳥道不遠雲
霞之間常有西南流逕旋鴻縣南又合如渾水是

總二水之名矣如渾水又東南流逕水固縣縣以太和中因山堂之日以氏縣也右會年水水出平城縣之西苑外武周塞北出東轉逕燕昌城南按燕書建興十年慕容寶自河而還軍敗於叅合死者六萬人十一年出衆北至叅合見積骸如山設策吊之死者父兄皆號泣六軍哀慟垂慙僨嘔血因而寢疾焉舉過平城北四十里疾篤築燕昌城而還即此城也故北俗謂之老公城也羊水又東注于如渾水亂流逕方嶺上有文明太皇太后陵陵之東北有高祖陵二陵之南有永固堂堂之四周隅雉列榭階欄檻及扉戶梁壁椽瓦悉文石也檐前西柱採洛陽之八風谷黑右爲之雕鏤隱起

以金銀間雲雉有若錦焉堂之內外四側結兩石扶帳青石屏風以文石爲緣並隱起忠孝之容題刻貞順之名廟前鐫石爲碑獸碑石至冢左右列栢四周迷禽閣日院外西側有思遠靈圖圖之西有齋堂南門表二石闕闕下斬山累結御路下望靈泉宮池皎若圓鏡矣羊水又東注如渾水又南至靈泉池枝津東南注池池東西一百步南北二百步池渚舊名白楊泉泉上出白楊樹因以名焉其猶長楊五柞之流稱矣南面舊京北背方嶺左右山源亭觀繡峙方湖及景若三山之倒水下如渾水又南逕北宮下舊宮人作薄所在如渾水又南分爲二水一水西出南屈入此苑中歷諸池沼

又南逕虎圈東魏太平真君五年成之以牢虎也
季秋之月聖上觀御圈上勅虎士効力於其下事
同奔戎生制猛獸即詩所謂袒裼暴虎獻于公所
也故魏有捍虎圖也又經平城西郭內魏太常七
年所成也城周西郭外有郊天壇壇之東側有郊
天碑建興四年立其水南又屈逕平城縣故城南
史記曰高帝先至平城史記音義曰在鴈門即此
縣矣王莽之平順也魏天興二年遷都於此太和
十六年破太華安昌諸殿造太極殿東西堂及朝
堂夾建象魏乾先中陽端門東西二掖門雲龍神
虎中華諸門皆飾以觀閣東堂東接太和殿殿之
東階下有一碑太和中立石是洛陽八風谷之緇

水有二源一水出朝歌城西北東南老人晨將渡
水而沉吟難濟紂問其故左右曰老者髓不實故
暑寒也紂乃於此斲脛而視髓也其水南流東屈
逕朝歌城南晉書地道記曰本沫邑也詩云爰采
唐矣沫之鄉矣殷王武丁始遷居之爲殷都也禹
貢紂都在冀州大陸之野即此矣有糟丘酒池之
事焉有新聲靡樂號邑朝歌晉灼曰史記樂書行
朝歌之音朝歌者歌不時也故墨子聞之惡而迴
車不逕其邑論撰考識曰邑名朝歌顏淵不舎七
十弟子掩目宰予獨顧由蹙墮車宋均曰子路患
宰予顧視凶地故以足蹙之使墮車也今城內有
殷鹿臺紂昔自投於火處也竹書紀年曰武王親

禽帝受于南單之臺遂分天之明南單之臺蓋鹿臺之異名也武王以殷之遺民封紂子武庚於茲邑分其地爲三曰邶鄘衛使管叔蔡叔霍叔輔之爲三監叛周討平以封康叔爲衛箕子佯狂自悲故琴操有箕子操逕其墟父母之邦也不勝悲作麥秀歌地居河淇之間戰國時皆屬於趙男女淫縱有紂之餘風後乃屬晉王儉多寇漢以虞詡爲令朋友以難治致弔詡曰不遇盤根錯節何以別利器乎又東與左水合謂之馬溝水水出朝歌城北東流南屈至其城東又東流與美溝合水出朝歌西北大嶺下更出逕駱駝谷於中逶迤九十曲故俗有美溝之目矣歷十二嶠嶠流相承泉響不斷返水捍注倦後深隍隍間積石千通水穴爲壑

觀者若思不周賞情之圖狀矣其水更逕朝歌城北又東南流注馬溝水又東南注淇水爲肥泉也故衛詩曰我思肥泉茲之永嘆毛注云同出異歸爲肥泉爾雅曰歸異出同曰肥釋名曰本同出時所浸澗水所歸枝散而多似肥者也捷爲舍人曰水異出流行合同曰肥今是水異出同歸矣博物志謂之澳水詩云瞻彼淇澳萋竹猗猗毛云綠王芻也竹編竹也漢武帝塞泲河斬淇園之竹木以爲用寇恂爲河內伐竹淇川治矢百餘萬以溢軍資今通望淇川無復此物唯王芻編草不異毛興又言澳隈也鄭亦不以爲津源而張司空專以爲

水流入於淇非所究也然斯水即詩所謂泉源之水也故衛詩云泉源在左淇水在右衛女思歸指以爲喻淇水左右蓋舉水所入爲左右也淇水又南歷坊堰舊淇水南東流逕黎陽縣界南入河地理曰志淇水出共東至黎陽入河溝洫志曰在遮害亭西一十八里至淇水曰是漢建安九年魏武王於水口下大枋木以成堰遏淇水東入白溝以通漕運故時人號其處爲枋頭是以盧諶征艱賦曰後昔法枋巨堰深渠高堤者也自後遂廢魏熙平中復通之故渠歷楊城北東出今瀆破故塌其堰悉鐵柱木石參用其故瀆南逕枋城西又南分爲二水一水南注清水水流上下更相通注河清

也每月隨斗所建之辰轉應天道此之異古也加靈臺於其上下則引水爲辟雍水側結石爲塘事准古制是太和中之所經建也如渾水又南與武周川水會水出縣西南山下二源翼導俱發一山東北流合成一川北流逕武周縣故城西王莽之桓周也又東北石合黃山水西出黃阜下重北流聖山之水注焉水出西山東流注于黃水黃水又東注武周川又東歷故亭北右合火山山西溪水水導源火山西北流山上有大井南北六十七步廣減尺許源深不見底炎勢上升常若微雷發響以草爨之則煙騰火發東方朔神異傳云南方有大山焉長四十里廣四五里其中皆生不燼之木晝

夜火然得雨猛風不滅火中有鼠重百斤毛長二尺餘細如絲色白時時出火以水逐而沃之則死取其毛績以爲布謂之火浣布是山亦其類也但卉物則不能然其山以火從地中出故亦名榮臺矣火井東五六尺又東有湯井廣輪與火井相狀勢熱又同以草內之則不然皆沾濡露結故俗以湯井爲目井東有文井祠以時祀祭焉井北百餘步有東西谷廣十許步南岬下有風穴厥大容人其深不測而穴中肅肅常有微風雖三伏盛暑猶須襲裘寒吹凌人不可暫停而其山出雛烏形類雅烏純黑而姣好音與之同續彩紺發紫若丹砂性馴良而易附非童幼子捕而執之赤紫烏亦曰

阿雛烏按爾雅純黑反哺謂之慈烏小而腹下白不反哺者謂之雅烏白頭而群飛者謂之燕烏大而白頭者謂之蒼烏爾雅曰鸞斯卑居也孫爰曰卑居楚烏捷爲舍人以爲壁屋說文謂之雅雅楚烏莊子曰雅賈矣馬融亦曰賈烏者也又按瑞應圖有三足烏赤烏白烏之名而無記於此烏故書其異耳自恒山已北並有此矣其水又東北流注武周川水武周川水又東南流水側有石砥洎舍并諸窟室比丘尼所居也其水又東轉逕靈巖南鑿石開山因崖結構其容巨壯法世所締山堂水殿烟寺相望林淵錦鏡綴目新眺川水又東南流出山魏土地記曰平城官西三十里武周塞口者

也自山口枝渠東出入苑溉諸園池苑囿洛陽殿
殿北有宮館一水自枝渠南流東南出火山水注
之水發火山東溪東北流出山山有石炭火之熱
間樵炭也又東注周武川逕平城縣東南流注如
渾水又南流逕斑氏縣故城東王莽之班也闕駟
十三州志曰班氏縣在郡西南百里北俗謂之去
留城也如渾水又東南流注于濕水濕水又東逕
北平邑縣故城南趙獻侯十三年城平邑地理志
曰屬代王莽所謂平湖也十三州志曰城在高柳
南八十里北俗謂之醜寅城濕水又東逕沙陵南
魏金田之地也事同曹武鄴中定矣濕水東逕犴
氏縣故城北王莽更名之曰犴聚也十三州志曰

縣有高柳南百三十里俗謂之苦力干城矣濕水
又東逕道人縣故城南地理志曰王莽之道仁也
地理風俗記曰初築此城有仙人遊其地故因以
爲城名矣今城北有淵潭而不注故俗謂之爲平
湖也十三州志曰道人城在高柳東北八十里所
未詳也濕水又東逕陽原縣故城南地理志代郡
之屬縣也北俗謂之比郝州城濕水又東水又東
陽水注之水出縣東北澤中北俗謂之太拔迴水
水自源東南流注于濕水又東逕東安陽縣故城
北趙惠文王三年封長子章爲代安陽君此即章
封邑王莽之競安也地理風俗記曰五原有西安
陽故此加東也濕水東逕昌平縣溫水注之水出

南墳下三源俱導合而南流東北逕濕水濕水又東逕昌平縣故城北王莽之長昌也昔牽招爲魏鮮卑校尉屯此濕水又東北逕桑乾縣故城西又屈逕其城北王莽更名之曰安德也魏土地記曰代城北九十里有桑乾城城西渡桑乾水去城十里
里有溫湯療疾有驗經言出南非也蓋悞證矣魏任城王彰以建安二十三年伐烏丸入涿郡遂北遂至桑乾止於此也水入東流祁夷水注之水出平舒縣東逕平舒縣之故城南澤中史記趙孝成王十九年以汾門予燕易平舒徐廣曰平舒在代王莽更名之曰平葆後漢世祖建武七年封陽武將軍馬成爲侯國其水控引衆泉以成一川魏土

地記曰代城西九十里有城平舒西南五里代水所出東北流言代水非也祁夷水又東北逕蘭亭南又東北逕石門關北舊道出中山故關也又東北流水側有故池按魏土地記曰代城西南三十里有代王魚池池西北有代王臺東云代城四十里祁夷水又東北得飛狐谷即廣野君所謂杜飛狐之口也蘇林據酈公之說言在上黨即實非也如淳言在代是矣晉建興中劉琨自代出飛狐口莽於安次即於此道也魏土地記曰代城南四十里有飛狐門門水西北流逕南舍亭西又逕句璩亭西西北注祁夷水祁夷水又東北流逕代城西盧植言初築此城板幹一夜自移此故代西南五

十里大澤中營城自護結葦爲九門於是就以爲
治城圓匝而不方周四十七里開九門更名其故
城曰東城趙滅代漢封孝文爲代王梅福上事曰
代谷者恒山在其南北塞在其北谷中之地上谷
在東代郡在西是其地也王莽更之曰厭狄亭魏
土地記曰城內有二泉一源流出城西門一源流
出城北門二源皆北注代水祁夷水又東北熱水
注之水出綾羅澤澤際有熱水亭其水東北流注
祁夷水又東北谷水注之出昌平縣故城南又東
北入祁夷祁夷右會逆水水導源將城東西北流
逕將城北在代城東北一十五里疑即東代矣而
尚傳將城之名盧植曰此城方就而板幹自移應

劭曰城徙西南去故代五十里故名代曰東城或
傳書倒錯情用疑焉而無以辯之逆水又西注于
祁夷之水逆之爲名以西流故也祁夷水東北逕
青牛淵水自淵東注之耆諺云有潜龍出于茲浦
形類青牛焉故淵潭受名矣潭深不測而水周多
蓮藕生焉祁夷水又北逕一故城西去代城五
十里又疑是代之東城而非所詳也又逕昌平郡
東魏太和中置西南去故城六十里又北連水入
焉水出碓脊縣東西北流逕碓脊縣故城南又西
逕廣昌城南魏土地記曰代南二百里有廣昌城
南通大嶺即此非也十三州記曰平舒城東九十
里有廣平城疑是城也尋其名狀付理爲非又西

逕王莽城南又西到刺山水注之水出到刺山西山甚層峻未有升其嶺者魏土地記曰代城東五十里有到刺山山上有佳大黃也其水北流逕一故亭東城北有石人故世謂之石人城西北注蓮水又北逕當縣故城西高祖十二年周勃定代斬陳豨於當城即此處也應劭曰當桓都山作城故曰當城也又逕故代東而西北流注祁夷水祁夷水西有隨山山上有神廟謂之女郎祠方俗所祠也祁夷水又北逕桑乾故城東而北流注于濕水地理志曰祁夷水出平舒縣北至桑乾入濕是也濕水又東北逕石山水口水出南山北流逕空侯城東魏土地記曰代城東北九十里有空侯城者其水又東北流注濕水濕水又東逕潘城縣北東合協陽關水水出協溪魏土地記曰下洛城西南九十里協陽關關道西通代郡其水東北流歷笄頭山關駟曰笄頭山在潘城南即是山也又北逕潘縣故城左會潘泉故瀆瀆舊上承潘泉於潘城中或云舜所都也魏土地記曰下洛城西南四十里有潘城城西北三里有歷山山上有虞舜廟十三州記曰廣平城東北一百一十里有潘縣地理志曰王莽更名樹武其泉從廣十數步東出城注協陽關水雨盛則通注陽旱則不流唯并泉而已關水又東北流注于濕水又東逕雍洛城南魏土地記曰下洛城西西二十里有雍洛城桑乾水

在城南東流者也濕水又東逕下洛縣故城南王莽之下忠也魏燕州廣寧縣廣寧郡治魏土地記曰去平城五十里城南二百步有堯廟濕水又東逕高邑亭北又東逕三臺北濕水又東逕無鄉城北地理風俗記曰燕語呼亡爲無今改宜鄉也濕水又東逕溫泉水注之水上承溫泉於橋山下魏土地記曰下洛城東南四十里有橋山下有溫泉泉上有祭堂雕簷華宇被于浦上石池吐泉湯湯其下炎涼代序是水灼焉無改能治百疾是使赴者若流池水北流入于濕水濕水又東左得于延水口水出塞外子玄鎮西長川城南小山山海經曰梁渠之山無草木多金玉循水出焉東南流逕

且如縣故城南應劭曰當城西北四十里有且如城故縣也代稱不拘名號變改校其程郭相去遠矣地理志曰東部都尉治于延水出縣北塞外即循水也循水又東南逕馬城縣故城北地理志曰東部都尉治十三州志曰馬城在高柳東二百四十里俗謂是水爲河頭河頭出戎方土俗變名耳又東逕零丁城南石令延鄉水水出縣西山東逕延陵縣故城北地理風俗記曰當城西北有延陵鄉故縣也俗指調之琦城川又東逕羅亭又東逕馬城南又東注脩水又東南於大寧郡北右注鴈門水山海經曰鴈門之水出于鴈門之山鴈出其間在高柳北高柳在代中其山重巒疊巘霞舉雲

高連山隱隱東出遼塞其水東南流逕高柳縣故
城北舊代郡治秦始皇二十三年虜趙王遷國以
爲郡王莽之所謂厭狄也建武十九年世祖封代
相堪爲侯國昔牽招斬韓忠於此處城在平城東
南六七十里於伐爲西北也鴈門水又東南流屈
逕一故城背山面澤北俗謂之叱嶮城鴈門水又
東南流屈而東北積而爲潭其陂斜長而不方東
北可二十餘里廣一十五里蒹葭蘭生焉敦水注
之導水導源西北少咸之山南麓東流逕叅合縣
故城南地理風俗記曰道人城北五十里有叅合
鄉故縣也敦水東又澗水注之出東阜下西北流
逕故城北俗謂之和堆城又北合敦水亂流東北
注鴈門水故山海經曰少咸之山敦水出焉東流
注于鴈門之水郭景純曰水出鴈門山謂斯水也
鴈門水又東北入陽門山謂之羊門水與神泉水
出葦壁北水有靈焉及其密雲不雨陽旱愆期多
禱請焉水有二流世謂之比連泉一水東北逕一
故城東世謂之石虎城而東北流注陽門水又東
逕三會亭北又東逕西伺道城北又東託台谷水
注之水上承神衆於葦壁北東逕羊門山南記台
谷謂之託台水汲引泉溪澤澤濤東注行者間一
十餘渡東逕三會城南又東逕託台亭北又東北
逕馬頭亭北東北注鴈門水鴈門水又東逕大甯
郡北魏大和中置有脩水注之即山海經所謂脩

水東流注于鴈門水也地理志曰有于延水而無鴈門脩水之名山海經有鴈門之目而燕說于延河自下亦通謂之于延水矣水側有桑林故時人亦謂是水爲蓼桑河也斯乃北土寡桑至此見之因以名焉于延水又東逕罌城南按史記蔡澤燕人也謝病歸相秦號罌成君疑即澤所邑也世名武罌城延水又東左與寧川水合水出西北東南流逕小寧縣故城西東南流注于延水又東逕小寧縣故城南地理志寧縣也西部都尉治王莽之博康也魏土地記曰大寧城西二十里有小寧城昔邑人班丘仲居水側賣藥於寧百餘年人以爲壽後地動宅壞仲與里中數十家皆死民人取仲

尸棄于延水中收其藥賣之仲被表從而詰之北人大怖叩頭求哀仲曰不恨汝故使人知我耳去矣後爲大餘王驛使永寧北方人謂之謫仙也于延水又東黑城川水注之水有三源出黑土城西北竒源合注總爲一川東南逕黑土城西又東南流逕大寧縣西而南入延河延河又東逕大寧縣故城南地理志云廣寧也王莽曰廣康矣魏土地記曰下洛西北百三十里大寧城于延水又東南逕茹縣故城北王莽之穀武也世謂之如口城魏土地記曰城在鳴雞山西十里南通大道西達寧川于延水又東南逕鳴雞山西魏土地記曰下洛城東北三十里有延河東流北有鳴雞山史記曰

趙襄子殺代王於夏屋而并其土襄子迎其姊於代其姊代之夫人也至此曰代已亡矣吾將何歸乎遂磨笄於山而自殺代人憐之爲立祠焉因名其爲磨笄山每夜有野雞群鳴於祠屋上故亦謂之爲鳴雞山魏土地記云代城東南二十五里有馬頭山其側有鍾乳穴趙襄子旣害代王迎姊姉代夫人夫人曰以弟慢夫非仁也以夫怨弟非義也磨笄自刺而死使者自殺民憐之爲立神屋於山側因名之爲磨笄山未詳孰是于延水又南逕且居縣故城南王莽之所謂文居也其水東南流注于濕水地理志曰于延水東至其寧入治非矣又東過涿鹿縣北

涿水出涿鹿山世謂之張公泉東北流逕涿鹿縣故城南王莽所謂橈陸也黃帝與蚩尤戰於涿鹿之野留其民於涿鹿之河即於是也其水又東北與陂泉合其水導源縣之東泉魏土地記曰下洛城東南六十里有涿鹿城城東一里有陂泉泉上有黃帝祠晉太康地理記曰陂泉亦地名也泉水東北流與蚩尤泉會水出蚩尤城城無東面魏土地記稱涿鹿城東南六里有蚩尤城泉水淵而不流霖雨併則流注陂泉亂流東北入涿水涿水又東逕平原郡南魏徙平原之民置此故立僑郡以統流雜涿水又東北逕祚亭北而東北入濕水亦云涿水枝分又匈奴者謂之涿耶地理潛顯難以

究昭非所知也濕水又東南左會清夷水亦謂之
滄河也水出長亭南西逕北城村故城北五西北
平鄉川水注之出平鄉亭西西北流注清夷水清
夷水又西北逕陰莫亭在居庸縣南十里清夷水
又西會牧牛山魏土地記曰沮陽城東八十里有
牧牛山下有九十九泉即滄河之上源也山在縣
東北三十里山上有道武皇帝廟耆舊云山下亦
有百泉競發有一神牛駁身自山而降下飲泉竭
故山得其名今山下導九十九泉積以成川西南
流國水與浮圖溝水注之出夷縣故城西南王莽
以爲朔調亭也其水俱西南流注于滄水又西南
右合地裂溝古老云晉世地裂分此界間成溝壑

有小水俗謂之分界水南流入滄河又西逕居庸
縣故城南魏上谷郡治昔劉虞攻公孫瓚不剋北
保此城爲瓚所擒有粟水入焉水出縣下城西枕
水又屈逕其縣南南注滄河又西與右陽溝水合
水出縣東北西南流逕居庸縣城北西逕大翻小
翻山南高巒截雲層陵斷霧雙阜共秀競舉群峯
之上郡人王次仲少有異志年及弱冠變蒼頡舊
文爲今隸書秦始皇時官務煩多以次仲所易文
簡便於事要竒而召之三徵而輒不至次仲履真
懷道窮數術之美始皇怒其不恭令檻車送之次
仲首發於邁化爲大鳥出在車外翻飛而去落三
翻於斯山故其峯巒有大翻小翻之名矣魏土地

記曰沮陽城東北六十里有大翻小翻山山上神名大翻神山屋東有溫湯水口其山在縣西北二十里峯舉四十里上廟則次仲廟也右出溫湯療治萬病泉所發之麓俗謂之土亭山此水炎熱倍甚諸湯下足便爛人體療疾者要須別引消息用之耳不得言次翻山東其水東南流左會陽溝水亂流南注滄河滄河又左得清夷水口魏土地記曰牧牛泉西流與清夷水合者也自下二水互受通矣清夷水又西靈亭城水注之水出焉蘭西澤中衆泉瀉流歸于澤澤水所鍾以成溝瀆瀆水又左與馬蘭溪水會水導馬蘭城城北負山勢因阿仍溪民居所給唯仗此水水南流出城東南入澤水澤水又南逕靈亭北又屈逕靈亭東落次仲烏翻於此故是亭有靈亭之稱矣其水又南流注于清水清水又西得泉溝水會水導源川南平地北注清夷水清夷水又西南得桓公泉蓋齊桓公霸世北伐山戎過孤竹西征東馬縣車上卑耳之西極故水受斯名也水源出沮陽縣故城北秦始皇上清夷水清夷水又西逕沮陽縣故城北秦始皇上谷郡治此王莽改郡曰朔調縣曰沮陽闕駟曰涿鹿東北至谷城六十里魏土地記曰城北有清夷水西流也其水又屈逕其城西南流注于溫水濕水南至馬陘山謂之落馬河

又東南出山

濕水又南入山瀑布飛梁縣河注壑崩湍十許丈
謂之馬落洪抑亦孟門之流也濕水自南出山謂
之清泉河俗亦謂之曰干水非也濕水又東南逕
良鄉縣之北界歷梁山南高粱水出焉

過廣陽薊縣北

濕水又東逕廣陽縣故城北謝承漢書曰世祖與
銚期出薊至廣陽欲南行即此城也謂之小廣陽
濕水又東北逕薊縣故城南魏氏土地記曰薊城
南七里有清泉河而不逕其北蓋經悞證矣昔周
武王封堯後於薊今城內西北隅有薊丘因丘以
名邑也猶魯之曲阜齊之營丘矣武王封召公之
故國也秦始皇二十三年滅燕以爲廣陽郡漢高

帝以封盧綰爲燕王更燕國城有萬載宮光明殿
王莽改曰廣公縣曰代成東掖門下舊慕容雋立
銅馬象虎昔慕容廆有駿馬赭白有奇相逸力至
雋光壽元年四十九矣而駿逸不虧雋奇之比鮑
氏騶命鑄銅以圖其像親爲銘讚鐫頌其傍像成
而馬死矣大城東門內道左有魏征南將軍建城
鄉景侯劉靖碑晉司隸故尉王密表功加於民宜
在祀典以元嘉四年九月二十日刊石建碑楊于
後葉矣溫水又東與洗馬溝水合水上承薊水西
注大湖湖有二源水俱出縣西北平地道泉流結
西湖湖東西二里南北三里蓋燕之舊池也淶水
澄澹川庭望遠亦爲遊矚之勝所也湖水東流爲

洗馬溝側城南東門注昔鈹期啓戟處也其水又東入濕水濕水又東逕燕王陵南陵有伏道西北出薊城中景明中造浮圖建利窮泉掘得此道王府所禁莫有尋者通城西北大陵而是二基趾盤固猶自高壯競不知何王陵濕水又東入高粱之水注焉水出薊城西北平地泉東注逕燕王陵北又東逕薊城北又東南流魏氏土地記曰薊東一十里有高粱之水者其水又東南入濕水也

又東至漁陽雍奴縣西入笥溝

漢光武建武二年封潁川太守寇恂爲雍奴侯魏遣張郃樂進圍雍奴即此城矣笥溝水之別名也魏氏土地記曰清泉河上承桑乾河東流與潞河合濕水東入漁陽所在枝分故俗諺云高粱無上源清泉無下尾蓋以高粱微涓淺薄裁足津通憑籍涓流方成川則清泉至潞所在分流更爲微津散漫難尋故也

水經卷第十三

水經卷第十四

漢桑欽撰

後魏酈道元注

濕餘水

沽水

鮑丘水

濡水

遼水

小遼水

淇水

濕餘水出上谷居庸關東

關在沮陽城東南六十里居庸界故關名矣使者入上谷耿沈迎之於居庸關即是關也其水導源關山南流歷故關下溪之東岍有石室三層其戶牖扇扉悉石也蓋古關之候臺矣南則絕谷累石為關址崇墉峻壁非輕功可舉山岫層深側道褊狹林鄣蘧嶮路才容軌曉禽暮獸寒鳴相和羈官

遊子聆之者莫不傷思矣其水歷山南逕軍都縣界又謂之軍都關續漢書曰尚書盧植隱上谷軍都山也其水南流出關謂之下口水流潛伏十許里是也

又東流過軍都縣南又東流過薊縣北

濕餘水故瀆東逕軍都縣故城南又東重源潛發積而爲潭謂之濕餘潭又東流易荆水注之其水導源西北逕千蓼泉亦曰丁蓼水東南流逕郁山西謂之易荆水公孫瓚之敗於鮑丘也走保易荆疑岨此水也易荆水又東左合虎眼泉水出平川東南流入易荆水又東南與孤山之水合水發川左道源孤山東南流入易荆水謂之塔界水又東

逕薊城又東逕平昌縣故城南又謂之昌平水魏氏土地記曰薊城東北一百四十里有昌平城城西有昌平河又東流注濕餘水濕餘水又東南流左右芹城水水出北山南逕芹城水東南流注濕餘水濕餘水又東南流逕安樂故城西更始使謁者韓鴻北狗承制拜吳漢爲安樂令此城也又北屈東南至孤奴縣西入于沽河

昔彭寵使孤奴令王梁南助光武起自是縣矣濕餘水於縣西南東入沽河故地理志曰濕餘水自軍都縣東至潞南入沽是也

沽河從塞外來

沽水出禦夷鎮西北九十里丹花嶺下東南流大

谷水注之水發鎮北大谷溪西南流逕獨石北界石孤生不因河而自峙又南九泉水注之水導北川左右翼注入川共成一水故有九源之稱其水南流至獨石注大谷水大谷水又南逕獨石西又南逕禦夷鎮城西魏大和中置以捍北狄也又東南尖谷水注之水源出鎮東北尖溪西南流逕鎮城東西南流注大谷水亂流南注沽水又南出峽岍有二城世謂之獨固門以其籍嶮憑固易爲依居兼壁昇聳踈通若門故得是名也沽水又南左合乾溪水引北川西南逕一故亭東又西南注沽水沽水又西南逕亦城東趙建武年并州刺史王霸爲燕所敗退保此城城在山阜之上下抗深隍

溪水之名籍以變稱故河有赤地之號矣沽水又東南與鵲谷水合有二源南即陽樂水也出且居縣地理志曰水出縣東北流大融山小融山北歷女祁縣故城南地理志曰東部都尉治王莽之祁縣也世謂之橫水又謂之陽曲河又東南逕一故亭又東左與舊鹵水合水之出西北山東南流逕舊鹵城北城在居庸縣西北二百里故名云侯鹵太和中更名禦夷鎮又東南流注陽樂水陽樂水又東南逕傍狼山南山石色特上亭亭孤立超出羣山之表又東南逕溫泉東泉在山曲之中又逕赤城西屈逕其城南東南入赤城河河水又東南右合高峰水水出高峰戍東南城在山上其水西

南流又屈而東南入沽水沽水又西南流出山逕
漁陽縣故城西而南合七度水水出北山黃頌谷
故亦謂之黃頌水東南流注于沽水沽水又南漁
水注之水出縣東南平地泉流西逕漁陽縣故城
南考諸地說則無聞所識釋考地尋川則有應氏
自今城在斯水之陽有符文說漁陽之名當屬此
秦發間左戍漁陽即是城也漁水又西南入沽水
又南與螺山之水合水出漁陽城南小山魏氏土
地記曰城南五里有螺山其水西南入沽水沽水
又南逕安樂縣故城東晉書地道記曰晉封劉禪
爲公國俗謂之西路水也

南過漁陽狐奴縣北西南與濕餘水合爲沽河

沽水西南流逕狐奴山西又南逕狐奴縣故城西
漁陽太守張堪於縣開稻田教民植種百姓得以
殷富童謠歌曰桑無附枝麥秀兩岐張君爲政樂
不可支視事八年匈奴不敢犯塞沽水又南陽重
溝水注之出狐奴山南轉逕狐奴城西王莽之所
謂舉符也側城南注右會沽水沽水又南濕餘水
注之沽水又南左會鮑丘水世所謂東路也沽水
又南逕潞縣爲有潞名潞河也魏氏土地記曰城
西三十里有潞河也
又東南至雍奴縣西筍溝
濕水入焉俗謂之合口也又東鮑丘水於縣西北
而東出焉

又東至南泉州縣與清河合東入于海清河者派河尾也

沽河又東南逕泉州縣故城東王莽之泉調也沽水又東南合清河也今無水清湛漳洄澁易涑濡沽虜池同歸于海故經曰派河尾也

鮑丘水從塞外來南過漁陽縣東

鮑丘水出禦夷北塞中南流逕九疋嶺東俗謂之大榆河又南逕鎮東南九十里西密雲戍西又南左合道人溪水水北川南流逕孔山西又歷密雲戍東左合孟廣峒水水出峒下峒甚增峻峨峨冠衆山之表其水西逕孔山南上有洞穴開明故土俗以孔山流稱峒水又西南至密雲戍東西注通

人水亂流西南逕密雲戍城南右會大榆河有東密雲故是城言西矣大榆河又東南流白楊泉水注之北發白楊溪望雖右注大榆河又東南龍菑溪水自決注之大榆河又東南峽逕安州舊漁陽郡之滑鹽縣南左合縣之北溪水水出縣北廣長塹南太和中掘此以防北狄其水南流逕滑鹽縣故城東王莽更名匡德也漢明帝改曰鹽田右承治世謂之斛鹽城西北去禦夷鎮二百里南注鮑丘水又南逕虎縣故城東王莽更之曰敦德也鮑丘水又西南逕獷平縣故城東王莽之所謂平獷也又南合三城水水出曰里山西逕三城獷謂之三城水又逕香陁山上悉生橐本香世故名焉又

西逕石窟南窟內寬廣行者依焉窟內有水淵而不流栖薄者取給焉又西北逕伏凌山南與石門水合水出伏凌山山高峻巖鄣寒深陰崖積雪凝水夏結事同離騷峨峨之詠故世人因以名山也水西南流注之是水有桑谷之名蓋汭出桑溪故也又西南獷平城東南而右注鮑丘水鮑丘水東南逕漁陽郡治也秦始皇二十二年置王莽更名通路縣曰得鮑丘水又西南流公孫瓚旣害劉虞烏丸思劉氏之德迎其子和合衆十萬破瓚於是水之上斬首一萬鮑丘水又西南歷狐奴城東又西南流注之于沽河亂流而南

又南過潞縣西

鮑丘水入潞通得鮑丘之稱矣高粱水注又首受濕水於戾陵堰水北有梁山山有燕刺王旦之陵故以戾陵各堰水自堰枝分東逕梁山南又東北逕劉靖碑北其去魏使持節都督河北道諸軍事征北將軍建城鄉侯沛國劉靖字文恭登梁山以觀源流相際以度形勢嘉武安之通渠美秦民之殷富乃使帳下督丁鴻軍士千人以嘉平二年立遏於水道高粱河造戾陵遏開車箱渠其遏表云高粱河水者出自并州黃河之別源時長岍峻固直截中流積石籠以爲主遏高一丈東西長三十三丈南北廣七十餘步依北岍丘水門門廣四丈立水十丈山川暴戾則乘遏東下平流守常則自門

地入灌田歲二千頃凡所封地百餘萬畝至景元三年辛酉詔書以民食轉廣陸廢不贍遣謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平東盡漁陽潞縣凡所潤舍四五百里所灌田萬有餘頃高下孔濟原隰底平䟽之斯漑決之斯散導渠口以爲濤門灑澆池以爲甘澤施加於當時敷被于後世晉元康四年君少子驍騎將軍平鄉侯弘受命使持節監幽州諸軍事領護烏丸校尉寧朔將軍遏立積二十六載至五年夏六月洪水暴出毀損四分之三乘北岍七十餘丈上渠車箱所在漫溢追惟前立遏之勲親

臨山川指授規畧命司馬關內侯逢惲內外將士二千人起長岸立石渠修立遏治水門門廣四丈立水五尺興復載利通塞之宜往遵舊制凡用功四萬有餘焉諸部王侯不召而自至繼負而事者蓋數千人詩載經始勿亟易稱民忘其勞斯之謂乎於是二府文武之士感秦國思鄭業之績魏人置豹祀之義乃遐慕仁政追述成功元康五年十月十一日刊石立表以紀勲烈并記遏制度永爲後式焉事見其碑辭又東南流薊縣北又東至潞縣注于鮑丘之水又南逕潞縣故城西王莽之通潞亭也漢光武遣吳漢耿弇等破銅馬五幡於潞東謂是縣也屈而東南流逕潞城南世祖拜彭寵

爲漁陽太守治此寵叛光武遣游擊將軍鄧隆代之軍於是水之南光武策其必敗果爲寵所破遺壁故壘存焉鮑丘水又東南入夏澤澤南紆曲渚一十餘里北佩謙澤眇望無限也

又南至雍奴縣北屈東入于海

鮑丘水自雍奴縣故城西北舊分笥溝水東出合笥溝斷衆川東注混同一瀆東逕其縣北又東與洵河合水出右北平無終縣西山白楊谷西北流逕平谷縣屈西南流獨樂水入焉水出北抱犢固平南逕谷縣故城東後漢建武元年光武遣十二將追大槍五幡及平谷大破之於是縣也其水南流入于洵洵水又左合盤山水水出山上其山峻

嶮人跡罕交去山三十許里望山上水可高二三十餘里素湍皓然頽波歷溪汭流而下自西北轉注于洵水洵水又東南逕平縣故城東南與洳河會水出北山山在虎溪縣故城東南東南流逕博陸故城北又屈逕其城東世謂之平陸城非也漢武帝封璽書封大司馬霍光爲侯國文穎曰博大陸平取其嘉名而無其縣食邑北海河東薛瓚曰按漢陽有博陸城謂此也今其居山之陽處平陸之上匝帶川流回據四水文氏所謂無縣目嘉美名也洳水又東南流逕平谷縣故城西而東南流注于渠洵河洵河又南逕緱城東而南合五百溝水水出七山北東逕平谷縣之緱城南東入于洵河

河又東南逕臨河城北屈而歷其城東側城南出
竹書紀年梁惠成王十六年齊師及燕戰于洵水
齊師遁即是水也洵水又南入鮑丘水又東合泉
州渠口故瀆上承宰池水於泉州縣故以泉州爲
名北逕泉州縣東又北逕雍奴縣東西去雍奴故
城一百二十里自虜池北入其下歷水澤一百八
十里入鮑丘河謂之泉州口陳壽魏志曰曾太祖
以踰頓擾邊公將征之從洵口鑿渠逕雍奴泉州
以通河海者也合無水鮑丘水又東庾水注之水
出右北平徐無縣北塞中而南流歷徐無山得黑
牛谷水又得沙谷水並西出山東流注庾水昔田
于秦避難居之衆至五千家開山圖曰山出不炭

之木生火之石案江云其木色黑似炭而無葉有
石赤石如丹以一石相磨則火發以然無水可以
終身今則無之其水又逕徐無縣故城東王莽之
北順亭魏氏土地記曰右北平城東北一百一十
里有徐無城其水又西南與周盧溪水合水出徐
無山東南流注庾水庾又西南流灑水注之水出
右北平後靡縣王莽之後靡也東南流世謂之車
輦水東南流與溫泉水合水出北山溪即溫源也
養疾者不能滌其炎漂以其過灼故魏氏土地記
曰徐無城東有溫湯即此也其水南流百步便伏
流入于地下水盛則通注灑水又東南逕石門峽
山之高嶄絕壁立洞開俗謂之石門口漢中平四

年漁陽張純反殺右北平太守劉政遼東太守陽紘中平五年與中郎將孟溢率公孫純討戰于石門大破之灑水又東南流謂之北黃水又屈而爲南黃水又西南逕無終山即帛仲理所合神丹處也又於是山作金五千斤以救百姓山有陽翁伯玉田在縣西北有陽公壇社即陽公之故居也搜神記曰雍伯雒陽人至性篤孝父母終沒葬之於無終山山高八十里而上無水雍伯置飲焉有人就飲與石一斗令種之玉生其田北平徐氏有女雍伯求之要以白璧一雙媒者致命伯至玉田求得五雙徐氏妻之遂即嫁焉陽氏譜叙言翁伯是周景王之孫食采陽樊春秋之末爰宅無終因陽

樊而易氏焉愛仁博施天祚玉田其碑文云居于縣北六十里翁同之山後路徙於西山之下陽公又遷焉而受玉田之賜情不好寶玉田自去今猶謂之爲玉田陽于寶曰於種石處四角作大石柱各一丈中央一頃之地名白玉田至今相傳云田玉之揭起于此矣而今不知所在同之譜叙自去文矣藍水注之水出北山東屈而南流逕無終縣故城東故城無終于國也春秋襄公十四年無終子嘉父使孟樂如晉因魏絳納虎豹之皮請和諸戎是也故燕地矣秦始皇二十二年滅燕置右北平郡治此王莽之所謂北順也漢世李廣爲郡出遇伏石謂虎也射之飲羽此處矣魏氏土地記曰

右北平城西北百三十里有無終城其水又南入
灋灋水又西南入于庚水地理志曰灋水出俊靡
縣南至無終東入庚水庚水世亦謂之爲柘水也
南逕燕山上懸巖之側有石鼓去地百餘丈望若
數百石困有石梁貫之鼓之東南有石援桴狀同
擊勢耆舊言燕山石鼓鳴則土有兵庚水又南逕
北平城西而南入鮑丘水謂之柘口鮑丘水又東
逕右北平郡故城南魏氏土地記曰薊城東北三
百里有右北平城鮑丘水又東巨梁水注之水出
土垠縣北陳宮山西南流逕觀雞山謂之觀雞水
水東有觀雞寺寺內起大堂甚高廣可容千僧下
悉結石爲之上加塗暨基內踈通技經脉散基側

室外四出爨火炎勢內流一堂盡温蓋以此土寒
嚴霜氣肅猛出家沙門率皆貧薄施主慮闕道業
故崇斯構是以志道者多栖託焉其水又西南流
又合區落水出縣北山東南流入巨梁水巨梁水
又西逕土垠縣故城西左會寒渡水水出縣東北
西南流至縣石注梁河河又南澗于水注之水出
東北山西南流逕土垠縣故城東西南流入巨梁
水又東南右合五里水水發北平城東北五里山
故世以五里名溝一名田繼泉西流南屈逕北平
城東東南流注巨梁河亂流入于鮑丘水巨梁自
是水之南極虜池西至泉州雍奴東極於海謂之
雍奴藪其澤野有九十九澱校流條右往往逕通

非唯河鮑丘歸海者也

濡水從塞外來東南過遼西令支縣北

濡水出禦夷鎮東南其水二源雙引夾山西北流出山合成一川又西北逕禦夷故城東鎮北百四十里北流左道則連泉水注之出故城東西北流逕故城南又西北逕淶水池南其水淵而不流其水又西屈而北流又東逕故城北連結兩池沼謂之連泉浦又東北注難河難河右則汗水入焉水出東塢南西北流逕沙野南北人名之曰沙鎮東北二百三十里西北入難河濡難聲相近狄俗語訛耳水又北逕沙野西又北逕箕安山東屈而東北流逕沙野北東北流逕林山北水北有池潭而不流

濡水又東北流逕孤山南東北流呂泉水注之水出呂泉塢西東南流屈而東逕塢南東北流三泉水注之其源三泉鴈次合爲一水鎮東北四百里東南注呂泉水呂泉水又東逕孤山北又東北逆流水注之水出東南導泉西流右屈而東北注木林山水會之水出山南東注逆水亂流東北注濡河濡河又東南水流迴曲謂之曲河鎮東北三百里又東出峽入安州界東南流逕渙陽白檀縣故城地理志曰濡水縣北蠻中漢景帝詔李廣曰將軍其帥師東轅弭節白檀者也又東南流右與要水合水出塞外三川並導謂之大要水也東南

流逕要陽縣故城東本都尉治王莽更之曰要術
矣要水又東南流逕白檀縣而東南流入于濡濡
水又東而南索頭水法之水北流南逕廣陽僑郡
西魏分右北平置今安州治又南流注于濡濡水
又東南流武列水入焉其水山川派合西源右爲
溪水亦曰西藏水東南流出溪與蟠泉水合泉發
州東十五里東流九十里東注西藏水西藏水又
西南流東藏水注之水出東溪一日東藏水西南
流出谷與中藏水合水導中溪南流出谷南注東
藏水故目其川曰三藏川水曰三藏水東藏水又
南右入西藏水亂流右會龍泉水水出東山下淵
深不測其水西南流注于三藏水三藏水又西南

流與龍菊水合兩出于龍菊之溪東流入藏水又
東南流逕列溪謂之武列水東南歷石罅下左層
巒之上有孤石雲輿臨崖危峻可高百餘刃牧守
所逕命選練之士彎弧矢無能屆其崇標者其水
東合流入濡濡水又東南五渡水注之水北出安
樂縣丁原山南流逕其縣故城西本三會城也其
水南入五渡塘於其川也流紆曲溯涉者頻濟故
川塘取名矣又南流注于濡濡水又與高石水合
水東出安樂縣東山西流歷川三會城南西入五
渡川下注濡水濡水又東南逕盧龍塞塞道自無
終東縣出渡濡水向林蘭陁東至肩陁盧龍之嶮
峻坂縈折故有九崢之名矣燕景昭元璽二年遣

將軍步渾治盧龍其道焚山刊石令通方軌刻石
嶺上以記事功其銘尚存而庾泉之注楊都賦言
盧龍山在平罌城北殊爲孟浪遠矣事實余按盧
龍東越青涇至凡城二百許里自凡城東北出趣
平罌故城可百八十里向黃龍則五百里故陳壽
魏志曰疇引軍出盧龍塞塹山堙谷五百餘里逕
白檀歷平罌登白狼望柳城平罌在盧龍東北遠
矣而仲初言在南非也濡水又東南逕盧龍故城
東漢建安十二年魏武征蹋頓所築也濡水又南
黃洛水注之水北出盧龍山南流入于濡濡水又
東南水名合焉水出盧龍塞西南流注濡水又合
屈而注得去潤水又會敖水二水並自盧龍西注

濡水又東南流逕令支縣故城東王莽之民亭也
秦始皇二十二年分燕置遼西郡令支縣焉魏氏
土地記曰肥如城西十里有濡水南流注逕孤竹
城西右合玄內也謂之小濡水非也水出肥如東
北玄溪西南流逕其縣東東屈南轉西迴逕肥如
縣故城南俗又謂肥如水非也故城肥子國應劭
曰晉滅肥子奔燕燕封於此故曰肥如也漢高
帝六年封蔡寅爲侯國西南流右會盧水水出縣
東北沮溪南流謂之大沮水又南左合陽樂水水
出東北陽樂縣地理風俗記曰陽樂故燕也遼西
郡治秦始皇二十二年置魏氏土地記曰海陽城
西南有陽樂城其水又西南入于沮水謂之陽口

沮水又西南小沮水注之發泠溪世謂之泠池又南得溫泉水口注之出東北溫溪自溪西南流入于小沮水小沮水又南流與大沮水合而爲盧水也桑欽說盧子之書言晉旣滅肥遷其族于盧水盧水有二渠號小沮大沮合而入于玄盧水又南與溫水合水出肥如城北西流注于玄水地理志曰盧水又南入玄水玄水又西南逕孤竹城北西入濡水故地理志曰玄水東入濡蓋自東而注也地理志曰令支有孤竹故城孤竹國也史記曰孤竹君之二子伯夷叔齊讓國於此而餓死於首陽漢靈帝時遼西太子廉翻夢入謂已曰余孤竹君之子伯夷之弟遼海漂吾棺槨聞君仁善願見藏覆明日視之水上有浮棺矣蚩笑者皆無疾而死於是改葬之晉書地道志曰遼西人見遼水有浮棺欲破之語曰我孤竹君也汝破我何爲因爲立祠焉祠在山上城在山側肥如縣南十二里水之會也

又東南過海陽縣西南入于海

濡水自孤竹城東南逕主鄉北瓠溝水注之出城東南東流注濡水濡水又逕牧城南分爲二水北水枝出世謂之小濡水也東逕樂安亭北東南入海濡水東南流逕樂安亭南東與新河故瀆合自雍奴縣承鮑丘水東出謂之鹽關口魏太祖征蹋頓與洵口俱導也世謂新河矣陳壽魏志以通河

海也新河又東北絕庾水又東北出逕右北平絕
沟渠之水又東北逕昌城縣故城北至王莽之叔
武也新河又東爲二水枝瀆東南入海新河自板
渠東出合封大水謂之交流合水出新平縣西南
流逕新平縣故城西地理志遼西之屬縣也又東
南流龍鮮水注之水出縣西北世謂之馬頭山二
源俱導南合一川東流注封大水地理志曰龍鮮
水東入封大水者也亂流南會新河南流于海地
理志曰封大水於海陽縣南入海新河又東出海
陽縣與緩靈水會水出新平縣東北世謂之大籠
山東南流逕令支城西西南流與新河合南流注
于海地理志曰緩靈水與封大水皆南入海新河

又東與素河會謂之白水口出令支縣之藍山南
合新河又東南入海新河又東至九過口枝分南
注海新河又東逕海陽縣故城南漢高祖六年封
搖海餘爲侯國魏土地記曰令支城南六十里有
海陽城者也新河又東與清水會水出海陽縣東
南流逕海陽城東又南合新河又南流一十許里
西入九過注海新河東絕清水又東木究水出焉
南入海新河又東左迤爲孔陽孤淀名右絕新河
南海注新河又東會于濡濡水又東南至叅縣碣
石山文穎曰碣石在遼西叅縣王莽之選武也叅
縣并屬臨瑜王莽更臨瑜爲憑德地理志曰大碣
石山在右北平驪城縣西南王莽改曰碣石也漢

武帝亦常登之以望巨海而勒其石於今此枕海有石如埤道數十里當山頂有大石如柱形往往而見立於巨海之中潮水大至及潮波退不動不沒不知深淺世名之天橋柱也狀若人造要亦非人力所就韋昭亦指此以爲碣石也三齊略記曰始皇於海中作石橋海神爲之豎柱始皇求爲相見神云我形醜莫圖我形當與帝相見乃入海四十里見海神左右莫動手工人潛以脚畫其狀神怒曰帝負約速去始皇轉馬還前脚猶立後脚隨崩僅得登岼盡者溺死於海衆山之石皆傾注今猶岌岌東趣疑即是也濡水於此南入海而不逕海陽縣西也蓋經悞證耳又按管子齊桓公二十二年征孤竹來至卑耳之谿十里闔然止瞠然視投弓將射引而未發謂左右曰見前乎左右對曰不見公曰寡人見長尺而人物具焉冠右祛衣走馬前豈有人若此乎管仲對曰臣聞豈山之神有偷兒長尺人物具霸王之君興則豈山之神見且走馬前走導也祛衣示前有水石祛衣示從右方涉也至卑耳之溪有贅水者從左方涉其深及冠右方涉其深至膝已涉大濟桓公拜曰仲父之聖此寡人之私罪也久矣今自孤竹南出則巨海矣而滄海之中山望多矣然卑耳之川若贅溪者亦不知所在也昔在漢世海水波襄吞食地廣當同碣石苞淪洪波也

大遼水出塞外衛白平山東南入塞過遼東襄平縣西遼水亦言出砮石山自塞外東流直遼東之望平縣西王莽之長說也屈而西南流逕襄平縣故城西秦始皇二十二年滅燕置遼東郡治此漢高帝八年封紀通爲侯國王莽之昌平也故平州治遼隧縣故城西王莽更名之曰順陸也公孫淵遣將軍畢衍拒司馬懿於遼隧即是處也遼水又南歷縣有小遼水其流注之也

又東南過房縣西

地理志曰房故遼東之屬縣遼水又右會白狼水水出右北平白狼縣東南廣成縣北流西北屈逕廣成縣故城南王莽之平虜也俗謂之廣都城又西北石城川水注之水出西南石城山東流逕石城縣故城南地理志曰右北平有石城縣北屈逕白鹿山西即白狼山也魏書國志曰遼西單于蹋頓尤強爲袁氏所厚故袁尚歸之數入爲害公出盧龍塹小堙谷五百餘里未至柳城二百里尚與蹋頓將數萬騎逆戰公登白狼山望柳城卒與虜遇乘其不整縱兵擊之虜衆大崩斬蹋頓胡漢降者二十萬口英雄記曰曹操於是繫馬鞍於馬上作十片即於此也博物志曰魏武於馬上逢獅子使格之殺傷甚衆王乃統率常從健兒數百人擊之獅子哮呼奮越左右咸驚王忽見一物從林中出如狸超上王車輓上獅子將至此獸便跳上獅

子頭上獅子即伏不敢起於是遂殺之得獅子而還未至洛陽四十里洛陽雞狗皆無鳴吠者也其水又東北入廣成縣東注白狼水白狼水北逕白狼縣城東王莽更名伏狄白狼水入東方城川水注之水發川西南山下流北屈逕一故城西世謂之雀目城東屈逕方城北東入白狼水白狼水又東北逕昌黎縣故城西地理志曰交黎也東部都尉治王莽之禽虜也應劭曰今昌黎也高平川水注之水出西北平川東流逕倭城北蓋委也人從之又東南逕乳樓城北蓋逕戎鄉邑兼夷稱之又東南注白狼水白狼水又東北自魯水注之導西北遠山東南注白狼水白狼水又東北逕龍山西

燕慕容晃以柳城之北龍山之南福地也使陽裕築龍城改柳城爲龍城縣十二年黑龍白龍見於龍山晃親觀龍去二百步祭以太牢二龍交首嬉翔解角而去晃悅大赦號新宮曰和龍宮立龍翔祠于山上白狼水又北逕黃龍城東十三州志曰遼東屬國都尉治昌黎道有黃龍亭者也魏營州刺史治魏氏土地記曰黃龍城西南有白狼河東北流附城東北下即是也又東北濫真水出西北塞外東南歷重山東南入白狼水白狼水又東北出東流爲二水右水疑即渝水也地理志曰渝水首受白狼水西南巡山逕一故城以爲河連城疑是臨渝縣之故城王莽曰憑德者矣渝水南流東

屈與一水會世名之曰榼倫水蓋戎方之變名耳
疑即地理所謂侯水北入渝者也十三州志曰侯
水南入渝地理志言蓋自北而南也又西南流注
于渝渝水又東南逕一故城東俗曰女羅城又南
逕營丘城西營丘在齊而名之於遼燕之間者蓋
燕齊遼迴僑分所在其水東南入海地理志曰渝
水自塞南入海一水東北出塞爲白狼水又東南
流至房縣至于遼魏氏土地記曰狼水下入遼也
又東過安市縣西南入于海

十三州志大遼水自塞西南至安市入于海
又玄兔高句麗縣有遼山小遼水所出西南至遼遂
縣入于大遼水也

縣故高句麗相之國也漢武帝元封二年平右渠
置玄兔郡於此王莽之下句麗水出遼山西南流
逕遼陽縣與大渠水會水出北塞外西南流逕至
遼水故地理志曰大梁水西南至遼陽入遼郡國
志曰縣故屬遼東後入玄兔其水西南流故謂之
爲梁水也小遼水又西南逕襄平縣爲淡淵晉永
嘉三年涸小遼水又逕襄平縣入大梁水司馬宣
王之平遼東也斬公孫淵於斯水之上者也

淇水出樂浪鏤方縣東南過于臨淇縣東入于海
許慎云淇水出鏤方東入海一曰出淇水縣十三
州志曰淇水縣在樂浪東北鏤方縣在郡東蓋出
其縣而逕鏤方也昔燕人衛滿自淇水而至朝鮮

朝鮮故箕子國也箕子教民以義田織信厚約以八法而下知禁遂成禮俗戰國時滿乃王之都王險城地方數千里至其孫右渠漢武帝元封二年遣樓船將軍楊僕左將軍荀彘討右渠破渠于淇水遂滅之若淇水東流無渡淇之理其地今高句麗之國治余訪蕃使言城在淇水之陽其水西流逕故樂浪朝鮮縣即樂浪郡治漢武帝置而西北流故地理志曰淇水西至增池縣入海又漢興以朝鮮爲遠循遼東故塞至淇水爲界考之今古於事差謬蓋經悞證也


水經卷第十四

水經卷第十五

洛水

漢桑欽撰

後魏酈道元注



洛水出京兆上洛縣謹舉山

地理志曰洛出冢嶺山山海經曰出上洛西山又曰謹舉之山洛水出焉東與丹水合水出西北竹山東南流注于洛

洛水又東戶水注之

水北出發戶山南流入洛

洛水又東得乳水

水北出良餘山南南注于洛

水又東會于龍餘之水

水出蟲尾之山東流入洛水又東至陽虛山合玄
扈之水是也又曰自鹿蹄之山以至玄扈之山凡
九山玄扈亦山名也而通與謹舉爲九山之次焉
故山海經曰此二山者洛間也是知玄扈之水出
于玄扈之山蓋山水兼受其目矣其水逕于陽虛
之下山海經曰又陽虛之山臨于玄扈之水是爲
洛汭也河圖玉板曰倉頡爲帝南巡登陽虛之山
臨于玄扈洛汭之水靈龜負書丹甲青文以授之
即於此水也又東歷清池山傍東合武里水水南
出武里山東北流注于洛

洛水又東門水出焉

爾雅所謂洛別爲波也洛水又東要水入焉水南

出三要山東北逕拒陽城西而東北流入于洛洛
水又東與獲水合水南出獲輿山俗謂之備水也
東北逕獲輿川世名之爲却川東北流注于洛
洛水又東逕熊耳山北

禹貢所謂導洛自熊耳博物志曰洛出熊耳蓋開
其源者是也

東北過盧氏縣南洛水逕陽渠關北

陽渠水出南陽渠山即荀渠山也其水一源兩分
川流半解一水西北流屈而東北入於洛山海經
曰熊耳之山浮豪之水出焉西北流注于洛疑即
建水也荀渠蓋熊耳之殊稱若太行之歸山也故
池說曰熊耳之山地門也洛水出其間是亦總名

矣其一水東北逕陽渠城西故關城也其水東北流注于洛

洛水又東逕盧氏縣故城南

竹書紀年晉出公十九年晉韓龍氏城王莽之昌富也有盧氏川水注之水北出盧氏山東南流逕盧氏城東而流注于洛水又東龍翼合三川並出縣之南山東北注洛開山圖曰盧氏山宜五穀可避水災亦通謂之石城山山在宜陽山西南千名之山咸處其內陵阜原險易以度身者也又有葛蔓谷水自南山流注洛水洛水又東逕高門城南即宋書所謂後軍外兵龐季明入盧氏進達高門木城者也

洛水東與高門水合

水出北山東南流合洛水枝津水上承洛水東北流逕右勒城北又東逕高門城北東入高門水亂流南注洛

洛水又東松楊溪水注之

水出松楊山北流注于洛洛水又東逕黃亭南又東合黃城溪水水出鵜鷁山有二峯峻極于天高崖雲峯兀石無階後徒喪其捷巧黷族窮其輕工及其長霄冒鎮層霞冠峰方乃就辨優劣耳故有大小鵜鷁之名矣溪水東南流歷亭下謂之黃亭溪水而東南入于洛水洛水又東得荀公漢口水出南山荀澗即龐季明所入荀公谷者也其水歷

谷東北流注于洛水洛水又東逕檀山南其山四絕孤峙山上有塢聚俗謂之檀山塢義熙中劉公西入長安舟師所屆次于洛陽命叅將戴延之與府舍人虞道元即舟溯流窮覽洛川欲知水軍可至之處延之屆此而返竟不達其源也
洛水又東庫谷水注之

水自宜陽山南三川並發合爲一溪東北流注于洛洛水又東得鶉鵠水口水發北鶉鵠澗東南流入于洛洛水又逕僕谷亭北左合北水水出北山東南流注于洛洛水又東侯谷水出南山北流入于洛洛水又東逕龍驤城北龍驤將軍王鎮惡從劉公西入長安陸徑所由故城得其名洛水又東北逕屯城西北流注于洛水也

又東北過蠡城邑之南

城西塢水出北四里山上原高二十五丈故澗池縣治南對金門塢水南五里舊宜陽縣治也洛水右會金門溪水水南出金門山北逕金門塢西北流入于洛洛水又東合欵水有二源並發而川逕引謂之大欵水也合而東南入于洛洛水又東黍良谷水入焉南出金門山開山圖曰山出多重固在韓建武二年強弩偏將軍陳俊轉聲金門白馬

皆破之即此也而東北流注于洛洛水又東左合
北溪南流入于洛水也

又東過陽市邑南又東北過于父邑之南

太陰谷水南出太陰溪北流注于洛洛水又東白
馬溪水出宜陽山澗有太石厥狀似馬故溪間以
物邑受名也溪水東又北流注于洛洛水又東有
昌澗水注之水出西北宜陽山而東南流遥宜陽
故郡南舊陽市邑也故洛陽都典農治此後改爲
郡其水又南注于洛洛水又東逕一合塢南城在
川北原上高二十丈南北東三箱天嶮峭絕唯築
西面即爲令固一合之名起於是矣劉曜之將攻
河南也晉將軍魏該奔於此故于父邑也洛水又
東合杜楊澗水出西北杜楊溪東南逕一合塢東
與槃谷水合亂流東南入洛

洛水又東渠谷

水出宜陽縣南女几山東北流逕雲中塢在上迢
帶層峻流烟半垂纓帶山阜故塢受其名水又東
北入洛水臧榮緒晉書稱孫登嘗經宜陽山作炭
人見之與語登不應作炭者覺其精神非常咸共
傳說太祖聞之使阮籍往觀與語亦不應籍因大
嘯登笑曰復作向聲又爲嘯求與俱出登不肯籍
因別去登上峰行且嘯如簫詔笙簧之音聲振山
谷籍怪而問作炭人作炭人曰故是向人聲籍更
求之不知所止推問久之乃知姓名余按孫綽之

叙高士傳言在蘇門山又別作登傳孫盛魏春秋亦言在蘇門山又不列姓名阮嗣宗感之著丈人先生論言吾不知其人即神遊自得不得與物交阮氏尚不能動其英操復不識何人而能得其姓名又東北過宜陽縣南

洛水之北有熊耳山雙巒競舉狀同熊耳此自別山不與禹貢導洛自熊耳同也昔漢光武破赤眉樊崇積甲仗與熊耳平即是山也山際有池池水東南流水側有一池世謂之澠池矣又東南逕宜陽縣故城西謂之西度水又東南流入于洛洛水又東逕宜陽縣故城南

秦武王以甘茂爲左丞相曰寡人欲通三川窺周室死不朽矣茂請約魏以攻韓斬首六萬遂拔宜陽城故韓地也後乃縣之漢哀帝封息夫躬爲侯國城之西門赤眉樊崇與盆子及大將等奉璽綬劔壁處世祖不即見明日陳兵於洛水見盆子等謂盆子丞相徐宣曰不悔乎宣曰不悔上嘆曰卿庸中皁鐵中錚錄也洛水又東與厭梁之水合水出縣北傳山大陂山無草木其水自陂北流屈而東南注世謂之五延水又東南流逕宜陽縣故城東東南流注于洛洛水又東南黃中澗水出北阜二源奇發摠成一川東流注于洛洛水又東祿泉注之其水近出北溪洛水又東共水入焉水北出長石之山山無草木其西有谷焉厥名共谷共水

出焉南流得尹溪口水出西北尹谷東南注之其
水又與西南左澗水會水東出近川西流注于共
水共水又南與李谷水出西西北李溪東南注秦
水秦水發源秦谷西南流與李谷水合而西南流
入共水共水世謂石頭泉而南流注于洛洛水又
東黑澗水南出陸渾西山歷于黑澗西北入洛洛
水又東臨亭川水注之水出西北近溪東南與湖
長澗水會水出北山南入臨亭水又東南歷九曲
西而南入洛水也

又東北出散關南

洛水東逕九西南其地十里有板之曲穆天子傳
所謂天子西征升于九阿此是也洛水又東與豪
水會水出新安縣密山南流歷九曲東而南流入
于洛洛水之側有石墨山山石盡黑可以書疏故
以石墨名山矣

洛水又東枝瀆左出焉

東出關絕惠水又逕清女冢南冢在北山上者舊
傳云斯女清貞秀古跡表來今矣故瀆又東逕周
山上有周靈王冢皇覽曰周靈王葬於河南城西
南周山上蓋以王生而神故謚曰靈其冢人祠之
不絕又東北逕栢亭南皇覽曰周山在栢亭西栢
謂斯亭也又東北逕三王陵東北出焉三王或言
周景王悼王定王也魏司徒公崔浩注西經賦云
定當爲敬子朝作難西周政弱人荒悼敬二王與

景三俱葬於此故世以三王名陵帝王世紀曰景王葬于瞿泉今洛陽太倉中大冢是也而復傳言在此所未詳矣又悼敬二王稽諸史傳復無葬處今陵東有石碑錄赧王以上世王名號考之碑記周墓明矣故瀆東北歷制鄉逕河南縣王城西歷邠鄆陌社預釋地曰縣西有邠鄆陌謂此也故瀆又北入穀蓋經始周啓瀆久廢不修矣洛水自枝瀆又東出關惠水右注之世謂之八關水戴延之西征記謂之八關澤即經所謂散關鄣自南山橫洛水北屬於河皆關塞也即楊僕家僮所築矣惠水出白石山之陽東南流與瞻水合水東出婁冢之山而南流入惠水惠水又東南謝水北出瞻諸之山東南流又有交觸之水北出廩山南流俱入惠水惠水又南流逕關北城二十里者也其城西岨塞垣東抗惠水靈帝中平元年以河南尹何進爲大將軍五營士屯都亭置函谷關廣城伊闕大谷轅轅挺門平津孟津等八關都尉官治此函谷爲之首在八關之限故世人物忽其統目有八關之名矣其水又南流入于洛水山海經曰白石之山惠水出其陽而南流注于洛謂是水也洛水又與虢水會水出林楮之山北流注于洛水之南則鹿蹄之山也世謂之非也其山陰則峻絕百仞陽則原阜隆平甘水發于東麓北流注于洛水也

又東北過河南縣南

周書稱周公將致政乃作大邑城周于中土南繫于洛水北因于邾山以爲天下之大湊孝經援神契曰八方之廣周洛爲中謂之洛邑竹書紀年晉定公二十年洛絕于周魏襄王九洛入城周山水大出南有甘洛城郡國志曰所謂甘城也地記曰洛水東北過五零倍尾北與澗瀍合是二水東入千金渠故瀆存焉

又東過洛陽縣南伊水從西來注之

洛陽周公所營洛邑也故洛誥曰我卜瀍水東亦惟洛食其城方七百二十丈南繫于洛水北因于邾山以爲天下之湊方六百里因西爲千里春秋昭公二十三年晉令諸侯大夫戍成周之城故亦

曰成周也遷自序云太史公留滯周南繫仲治曰古之周南今之洛陽漢高祖始欲都之感婁敬之言不日而駕行矣屬光武中興宸居洛邑逮於魏晉咸兩宅焉故魏略曰漢大行忌水故去其水而加佳魏爲土德土水之母也水得土而流土得水而柔陰佳加水長沙耆舊傳曰祝官字召卿爲洛陽令歲時亢旱天子祈雨不得良乃曝身階庭告誠引罪自晨至中紫雲水起甘雨登降人爲歌曰天久不雨蒸人失所天王自出祝令特苦精符感應滂沱下雨則縣司及河南尹治司隸周官也漢武帝使領徒隸董督京畿因名司州焉地記曰洛水東入于中提山間東流會于伊是也昔黃帝之

時天大霧三日帝遊洛水之上見大魚煞五牲以醮之天乃甚雨七日七夜魚流始得圖書今河圖視萌篇是也昔王子晉好吹鳳笙招延與道士浮丘同遊伊洛之浦舍始又受玉雞之儒瑞於此水亦洛神宓妃之所在也洛水又東合水南出半石之山北逕今水塢而東北流注于公路澗但世俗音訛號之曰光祿澗非也上有素術固四周絕澗迢迤百仞廣四五里有一水淵而不流故溪澗即其名也合水北與劉水合水出半石東山西北流于劉聚三百臨澗在緱氏西南周畿內劉子國故謂之劉澗其水西北流注于合水合水又北流注于洛水也

又東過偃師縣南

洛水東逕計素渚中朝時百國貢計所頓故渚得其名又東偃師故縣南與緱氏分水又東休水自南注之其水導源少室山西流逕穴山南而北與少室山合水出少室北溪西南流注休水休水又左會南溪水發大穴南山北流入休水休水又西南北屈潛流地下其故瀆北屈出峽謂之大穴口北歷覆釜堆東蓋以物象受名矣又東屆零星塢水流潛通重源又發側緱氏原開山圖謂之緱氏山也亦云仙者昇焉言王子晉控鶴斯阜靈王望而不得近舉手謝而去其家得遺屐俗亦謂之爲撫父堆堆上有子晉祠或言在九山非此世代已

遠矣莫能辨之劉向仙傳云世有簫管之聲焉休
水又逕延壽城南緱氏縣治故滑費春秋滑國郡
都也王莽更名中亭即緱氏城也城有仙人祠謂
之仙人觀休水又西轉北屈逕其城西水之西南
有司空密陵光侯鄭廟碑文缺不可復識又有晉
城門校尉昌原恭侯鄭仲林碑晉皇始六年立休
水又北流注于洛水洛水又東逕百谷塢北戴延
之西征記曰塢在川南因而爲塢高一十餘丈劉
武王西入長安舟師所堡也

洛水又北陽渠水注之

竹書紀年晉襄公六年洛絕于洶即此處也洛水
又北逕偃師城東東北歷鄆中水南謂之南鄆中

水之南鄆亦曰上鄆也逕訾城西司馬彪所謂訾
聚也而鄆水注之水出北山鄆溪其水南流世謂
之溫水泉水側有重人穴穴中有僵尸戴延之從
劉武王西征記曰有此尸尸今猶在夫物無不化
之理魂無不遷之道而此尸無神識事同木偶之
狀喻其推移未若正形之連遷矣鄆水又東南於
訾城西北東入洛水故京相璠曰今鞏洛渡北有
水鄆谷東入洛謂之下鄆故有上鄆下鄆之名亦
謂之北鄆於是有南鄆北鄆之稱矣又有鄆城蓋
周大夫鄆盱之舊邑

洛水又東逕訾城北又東羅水注之

出方山羅川西北流蒲池水注之出南蒲陂西北

流合羅水謂之長川羅亦曰羅中也蓋盼子尋羅之宿居故川得其名耳羅水又西北白馬溪水注之水出崧山北麓逕白馬塢東而北入羅水西北流白相澗水注之水出嵩麓桐溪北流逕九山東又北九山東溪水入焉水出百稱山東谷其山孤峰秀出巉嶢分立伸長統曰昔密有卜城者身遊九山之上放心不拘之境謂是山也山際有九山廟廟前有碑云九顯靈君者太華之元子陽九列名號曰九山府君也南據崧岳北帶洛澗晉元康二年九月太歲庚午帝遣殿中中郎將關內侯樊廣縱氏令王與傳演奉宣詔命興立廟殿焉又有百蟲將軍顯靈碑碑云將軍姓伊氏諱益字墮散

帝高陽之第二子伯益者也晉元康五年七月七日順人吳義等建立堂廟永平元年二月二十日刻石立頌贊示後賢矣其水東北流八百相澗又北逕袁公塢東蓋公路始固有此也故有袁公之名矣北流注于羅水羅水又西北逕袁公塢北又西北逕潘岳子父墓前有碑岳父茆瑯琊太守碑石破落文字岳敗岳碑題云給事黃門侍郎潘君之碑碑云君遇孫秀之難闔門受禍故門生感覆醢以增慟乃對碑以記事大常潘尼之辭也羅水又於訾城東北入于洛水也又東北過鞏縣東又北入于河

洛水又東明樂泉注之水出南原下三泉並導故

世謂之五道泉即古明溪泉也春秋昭公二十二年師次于明溪者也洛水又東逕鞏縣故城南東周所居也本周之畿內鞏伯國也春秋左傳所謂尹文父涉于鞏即於此矣洛水又東濁水注之即古湟水也水出南原京相璠曰訾城北三里有黃亭陌此亭也春秋所謂次于黃者也洛水又東北洞水發南溪石泉世亦名之爲石泉也京相璠曰鞏東地名坎飲在洞水東疑即此水也又逕盤谷塢東世又名之曰鹽谷水司馬彪郡國志鞏有坎飲聚春秋僖公二十四年王出及坎飲服虔亦以爲鞏東邑名也今考厥文若狀焉而不能精辨耳晉太康地記晉書地道並言在鞏西非也其水又

北入洛

洛水東北流入于河

山海經曰洛水成臯西入河是也謂之洛汭即什谷也故張儀說秦曰下兵三川塞什谷之口謂此川也史記晉義曰鞏縣有鄆谷水者也黃帝東巡河過洛修壇沉璧受龍圖於河龜書于洛赤文篆字堯帝又循壇河洛釋良即沉榮光出河休氣四塞白雲起迴風逝赤文綠色廣袤九尺負理平上有列星之分什政之度帝王錄記興亡之數以授之又東沈書於日稷赤光起玄龜負書背甲赤文成字遂禪於舜舜又習堯祀沈書於日稷赤光起玄龜負位至于稷下榮光休至黃龍卷甲書圖壇

畔赤文綠錯以授舜舜以禪禹殷湯東觀於洛習
禮堯壇降璧三沈榮光不起黃魚雙躍出濟於壇
黑鳥以洛隨魚亦上化爲黑玉赤勒之書黑龜赤
文之題也湯以伐桀故春秋說題辭曰河以道坤
出天苞洛以流川吐地符王者沉禮焉竹書紀年
曰洛伯用與河伯馮夷鬪蓋洛水之神也昔夏大
康失政爲羿所逐其昆弟五人須於洛汭作五子
之歌於是地矣

伊水出南陽縣西荀渠山

山海經曰蔓渠之山伊水出焉淮南子曰伊水出
上魏山地理志曰出熊耳山即麓大同陵巒互別
耳水自熊耳東北逕鸞川亭北茲水出茲山北流
際其城東而北入伊水世人謂伊水爲鸞水茲水
爲交水故名斯川爲鸞川也又東爲淵潭潭渾若
沸亦不測其深淺也伊水又東北逕東亭城南又
屈逕其亭東東流者也

東北過郭落山

陽水出陽山陽溪世人謂之太陽谷水亦取名焉
東流入伊水伊水又東北鮮水入焉水出鮮山北
流注于伊尹水又與蠻水合水出盧氏縣之蠻谷
東流入于伊

又東北過陸渾縣南

山海經曰瀟瀟之水出於釐山南流注于伊水今
水出陸渾縣之西南王母澗澗北山上有王母祠

故世因以名溪東流注于伊水即瀟瀟之水也伊水歷崕口山峽也翼崕深高壁立若闕崕上有塢伊水逕其下歷峽北流即古三塗山也杜預釋地曰山在縣南闕駟十三州志云山在東南今是山在陸澤故城東南八十許里春秋昭公四年司馬侯曰四嶽三塗陽城太室荆山中南九州之險也服虔曰三塗大行轅轅崕非南望也京相璠之著春秋地名亦云山名也以服氏之言云塗道也淮周書南望之文復言宜爲轅轅大道伊闕皆爲非也春秋晉伐陸渾請有事於三塗知是山明矣有七谷水注之水西出女桃山之南七溪山上有西王母祠東南流注于伊水又北蚤谷水注之水出女杭山之東谷東逕故亭南東流又于伊水伊水又東北逕伏流嶺東嶺上有崑崙祠民猶祈焉劉澄之永初記稱陸渾縣西有伏流坂者也今山在縣南崕口北三十里許西則非也北與溫泉水合水出新城縣之狼臯山之西南阜下西南流會于伊水伊水又東北逕伏睹嶺左納焦澗水水西出鹿臍山東流狐山南其山分立豐上單秀孤峙故世謂之方山即劉中書澄之所謂縣有孤山者也東歷伏睹嶺南東流注于伊伊水又東北涓水注之水出陸渾西山即陸渾山者也尋郭文之故居訪胡昭之遺像世去不停莫識所在其水有二源俱導而東注號略在陸渾縣西九十里也司馬

慮郡國志曰縣西號略池春秋所謂東盡于號略者也北水東流合侯澗水澗出西北侯溪東南流注于涓水涓水又東逕陸渾縣故城北平王東遷辛有適伊川見有被髮而祭於野曰不及百年此其戎乎魯僖公二十二年春晉遷陸渾之戎于伊川故縣氏之也涓水東南流左合南水水出西山七谷亦謂之七谷水祖澗東逝歷其縣南又東南左會北水亂流左合禪渚渚水土承陸渾縣東禪渚渚左原上陂方十里佳饒魚蕈即山海經所謂南望禪諸禹父之所化郭景純注云一禪音暖縣化羽淵而復在此然已變恠亦無往而不化矣世謂此澤爲慎望陂陂水南流注于涓陽水涓陽水

又東南注于伊水昔有宰氏女採桑於伊川得嬰兒于空桑中言其母孕於伊水之濱夢神告之曰曰水出而東走毋明視而見曰水出焉告其都居而走顧望其邑咸爲水矣其母化爲空桑子在其中矣萃女取而獻之命養於庖而長有賢德殷以爲尹曰伊尹也

又東北過新城縣南

馬懷橋長水出新城西山東逕晉使持節征南將軍宋均碑南均字文平縣人也其碑大始三年十二月立其水又東流入于伊又有明水出梁縣西狼罽山俗謂之石澗水也西北流逕楊亮壘南西北合康水亦狼罽山東北流逕范塢北與明水合

北汶西南流入于伊山海經曰放罫之山明水出爾南流注于伊水是也伊水又與大戟水會出渠縣西水有二源北水出廣城西南西南逕楊志塢北與南水合水源南出廣城澤西流陸渾河南十二縣薄曰廣城澤在新城縣界黃阜西北流屈而東逕楊塢南又北屈逕其塢東又逕塢北同注老倒澗俗謂之老倒澗水西流入于伊伊水又北逕新城東與吳澗水會水出縣之西山東流南屈逕其縣故城西又東轉逕其縣南故蠻子國也縣有郢聚今名蠻中是也漢惠帝四年置縣其水又東北流注于伊水伊水又逕西北當階西大狂水入焉水東出陽城縣之大苦山山海經曰大苦之山

多璉琇之玉其陽狂水出焉西南流其中多三足龜人食之者無大疾可以已腫狂水又西逼綸氏縣故城南竹書紀年曰楚吾得帥師及秦伐鄭圍綸氏者也左與倚薄山水合水北出倚薄之山南逕城黃西又南經綸氏故城東而南流注于狂水狂水又東入風溪水注之水北出八風山南流逕綸氏城西西南流入于狂水狂水又西得三交水口水有二源各道一溪並出山南流合舍故世有三交之名也其水西南流注于狂水狂水又西逕企高山北西南與湮水合水出東北湮谷西南流逕武林亭東北又屈逕其亭南其水又西南逕湮陽亭東蓋籍水以名亭也又東南流入于狂狂水

又西逕湮陽城南又西逕當階城南而西流注于伊伊水又上溝水出玄望西山東逕玄望山南又東逕新城縣故城北東流注于伊水伊水又北板橋水入焉水出西山東流入于伊水伊水又北會厭澗水水出西山東流逕邠垂亭南春秋左傳文公十七年秋周甘斨敗戎於邠垂者也服虔曰邠垂在高都南杜預釋地曰河南新城縣北有邠垂亭司馬彪郡國志曰新城有高都城今亭在城南七里遺基在京相璠曰舊說言邠垂在高都南今上黨有高都縣余謂京論踈遠未足以證無知羣說之旨密矣其水又東注于伊水伊水又北逕高都城東徐廣史記音義曰今河南新城縣有高都城竹書紀年梁惠成王十七年東周與鄭高都利者也又來儒之水出于半石之山西南流逕斌輪城北西歷芟澗水以其西流又謂之小狂水也其水又西南逕大石嶺南開山圖所謂大石山也山下有大石嶺碑河南隱士通明以漢靈帝中平六年八月戊辰於山堂立碑文字淺鄙殆不可尋魏文帝獵于此山虎超乘輿孫禮拔劍投虎於是山在洛陽南而劉澄之言在洛東北非也山阿有魏明帝高平陵王隱晉書曰惠帝使校尉陳總仲元詣洛南山請雨總盡除小祀唯存大石而祈之七日大雨即是山也來儒之水又西南逕赤眉城南又西至高都城東西入伊水謂之曲水也

又東北過伊闕中

伊水逕前亭西左傳昭公三十二年晉箕遺樂徵右行跪濟師取前城者也京相璠曰今洛陽西南五十里伊闕外前亭矣服虔曰前瀆爲泉周地也伊水又北入伊闕昔大禹疏以通水兩山相對望之若闕伊水歷其間北流故謂之伊闕矣春秋之闕塞焉昭公二十六年趙鞅使女寬守闕塞是也陸機云洛有四闕斯其一焉東巖西嶺並鑄石開軒高薨架峰西側靈巖下泉流東注入于伊水傳毅反都賦曰困龍門以暢化開伊闕以達聰也闕左壁有石銘云黃初四年六月二十四日辛巳大出水舉高四丈五尺齊此已下蓋記水之漲減也

石壁又有石銘云永康五年河南府君循大禹之軌部督郵辛曜新城令王琨部監作掾董倚李褒斬岍開石平通伊闕石文尚存也

又東北至洛陽縣南北入于洛

伊水自闕東北流之津右出焉東北引漑東會合水同注公路澗入于洛合無水戰國策曰東周欲爲田西周不下水蘇子見西周君曰今不下水所以富東周也民皆種他種欲食之不如下水以病之東周不必復種稻種稻而復奪之是東周受於君矣西周遂下水即是水之故渠也伊水又東北枝渠左出焉水積成湖北流注于洛今伊水伊水又東北至洛陽縣南逕負丘東大魏郊天之所准

漢故事建之漢書郊祀志曰建武二年初制郊兆於洛陽城南七里爲園壇八陛中又爲重壇天地位其上背南向其外壇上爲五帝位其外爲壇重營皆紫以像宮按禮天子大裘而冕祭昊天上帝於此今衮冕也壇墳無復紫矣伊水又東北流注于洛水廣志曰鯢魚聲如小兒有四足形如鱧可以治牛出伊水也司馬遷謂之人魚故著其史記曰始皇帝之葬也以人魚膏爲燭徐廣曰人魚似鮎而四足即鯢魚也

灋水出河南穀城縣北山

縣北有潛亭灋水出其北梓澤中梓澤地名也澤北對原阜即裴氏墓塋所在碑闕存焉其水歷澤

東南流水西有一原其上平敞古舊亭之處也即潘安仁西征賦所謂越街郵者也

東與千金渠合

周書曰我卜灋水西謂是水也東南流水西南有帛仲理墓墓前有碑題云真人帛君之表仲理名護益州巴郡人晉永寧二年十一月立灋水又東南流注于穀穀水自千金塢東注謂之千金渠也又東過洛陽縣南又東過偃師縣又東入于洛

澗水出新安縣南白石山

山海經曰白石之山惠水出于其陽東南注于洛澗水出于其陰北流注于穀世謂是山曰廣陽山水曰赤岍水亦曰石子澗地理志曰澗水出新安

縣東南東入洛是爲密矣東北流歷函谷東坂東
謂之八特坂山海經曰北流注于穀摯仲治三輔
決錄注云馬氏兄弟五人共居澗穀二水之交作
五門客因舍以爲名今在河南西四十里以山海
經推校里數不殊仲治所記水會尚有故居處斯
則澗水也即周書所謂我上澗水東言水者是也
東南入于洛

孔安國曰澗水出澗池山今新安縣西北有一水
北出澗池界東南流逕新安縣而東南流入于穀
水安國所言當斯水也然穀水出澗池下合澗水
得其通稱或亦指之爲澗水也並未詳之耳今考
水東十里有水世謂之慈澗又謂之澗水按山海

經則少水也而非澗水蓋習俗之悞耳又按河南
有離山水謂之爲澗水水西北出離山東南流注
于離山澗水也又東南流歷邾山於穀城東而南
流注于穀舊與穀水亂流流同南入于洛今穀水
東入于金渠澗水與之俱東入洛矣或以是水並
爲周公之所相卜也呂忱曰今河南使水疑其是
即此水也然意所未詳故並書存之耳

